

Sveti Andrija

Kada se je Svetoga Andriju gradilo
pinezi se je lipe za njega brojilo
ekuli su svi davali za crikvu graditi
aš su se bojali da bi mogli pozabjeni biti
kad se bude vela maša prvi put mašila,
kad se budu očito jimena svih govorila.
Konti Mikulini zamju su za nju dali.
Oni su se prije na Pešćivici zakapali
i na Dunat va nediju na mašu pejali
Mrakovčići va svojih kavah su kavali,
na kargacih velikih ogulsko kamenje pejali,
lomine su ravne na jakih vlačicah vlačili,
zi kimi su potlik crikvi tla poškrilili.
Franolići su dubčeva driva za kritinu dali,
Marojevići kupe za krov Baški su kupili
i zi duplačicu po moru zi Baške jih vozili.
Lukarići bihu drivene kore lipo otesali,
pa jih lipe glatke zi band crikvi klali.
Sokolići meštri dobri škrile oklesali,
sve su jin rubići z finin melon oluštrali.
Od ploč su luntar veli lipi učinili
i na njemu jesenov križ sveti utvrdili.
Kolo crikve bihu dubci posajeni
ki su zimi goli a liton zeleni.
Aš su dubci driva hrvaskoga puka
koga ne dešva ni strila zloguka.
Na ročinu velu zbande zvono obišeno
ko no je va Čabru odzdavnaj kupjeno.
Tisuću dvasat dvajseto godišće finilo
vesu se je crikvu z rimon zgradilo.
Prvoga va rim staroga Mikulina zakopali.
Z Gradca kraj Vrbnika njega su nosili
trmuntanskoj strani v crikvi su ga pokrili...
Drugoga biloga Brusića na groblje su zakopali
njega su ovamo zi Dubašnice pripejali.
Tretja je bila žena mlada zakopana,
udovica Mare od Žica Mikulina Tolana,
cić toga su dicu ki su za nju ustali
na Punt i iżuli vesoj Maračići zvali.
Crikvi se je prvi Frankulin oženil
a Orlić je Roko prvi dite krstil.
Zvon je šempre zvonil i Punat hvalil
vazda je sveti Andrija nad Punton badril
nad zakopanimi tužnu je tugu tugoval
va svojen rimu mir i pokoj duši jin dal.